

# Nama Reti Pengidup?

## BAGI KE TIGA

---

### Tanya #2: Nama Tuju/Kebuah Kitai Bisi Ba Dunya Tu?

---

#### A. Nama kebuah Kitai tau bisi ba dunya tu?

Mayuh kitai enda nemu nama kebuah kitai tau bisi ba dunya tu? Nama kebuah indai aku beranak ka aku? Nama kebuah aku idup? Nama Kebuah TUHAN ngaga kitai mensia? Sebedau kitai belajar enggau dalam agi pasal kebuah kitai tau bisi ba dunya tu, dulu kitai sama berati ka runding enggau peragam siku-siku kitai mensia ti idup ba dunya tu;

a) Ngiga pengeraja, ngulih ka semua pemisi ka endang diguna kena idup.

- i. Rumah enggau kereta besai, gari ka mar sereta manah, bisi perengka dalam rumah ka chukup badas, enggau bebeli ka emas, laban kitai ngira enti kitai ngembuan pemisi ka chukup mayuh lebih ari orang bukai tau ngasuh ati kitai lantang, pengidup kitai senang, tang kitai nadai berunding ni maya seput kitai tau abis, **Tang kati kitai puas? Jaku Tangkan: “Sapa ti ngerunding diri bediri tegap, manah agi iya bejaga-jaga enggai ka rebah” (1 Korint 10:12).**
  - ☞ Sekeda kitai ngasai ka diri empu endang amat lantang dalam pemisi (pengeraja). Nadai utai ti tau ngirau ati laban duit mayuh sereta pengidup bisi penyamai, nadai kiruh nyanda ngagai orang bukai. Semua utai ti diguna ulih dibeli magang. Lebu pengelantang pengidup penuh enggau pengeraja dunya, dia sekeda kitai nadai ingat ka TUHAN, lalu sekeda ingat ka TUHAN tang enda bebendar nangi sereta ngasi ka IYA. Laban lebu kitai mayuh duit, dia kitai ngasai ka nadai penyuntok dalam pengidup. Enti sema sakit, kitai ulih mayar lutor ‘pakar’ ngubat penyakit, janji bisi duit. Sekeda (ukai semua orang) orang ti bakatu semina ngerunding diri empu, lalu nadai pengirau ka Allah Taala. Sekeda sida mega enda sedar, sereta nadai peduli ka pengidup ti deka datai udah kitai mati ninggal ka dunya tu. Laban iya nadai pengadang ti bepun ari Allah Taala.

- ii. Bup Kudus ngelalau kitai enggau penemu ti manah, awak ka kitai enda tekellu tekait ati ngagai pengeraja dunya. <sup>9</sup>*Tang sapa ti deka ka diri kaya deka labuh dalam penguji, kena sintak panjuk enggau ka dalam mayuh pemeli enggau mayuh pengingin ti tau ngemedis, ti nengelam ka mensia ngagai pengerusak enggau pemerinsa.* <sup>10</sup>*Pengawa ti ingin ka duit, nya pun semua penyai. Laban sekeda sida limping ari pengarap kategal ulih pengamu, ti ngujung ka ngenusah diri empu enggau mayuh macham pemerinsa” (1 Timoti 6:9-10).*

- ☞ Baka nya pan mayuh pemandang (bukti) udah dipeda, nyampau mega orang ti agi arap ka duit nya endang amat mai pengelantang. Orang kaya agi majak deka kaya, ti ngujung ka sida kena sintak panjuk pusin pengidup ti nadai tau abis, lalu nya ti mai pengerusak. Baka ni kitai ulih nyeliah ka diri ari ti balat rindu amat ka duit? Rasul Paul meri kitai sekeda ajar bakatu; (1) Ba timpoh ti enda ditemu kitai pengaya nya deka lenyau (baris 6:7, 17); (2) Kitai patut puas ati enggau pengaya ti

## Nama Reti Pengidup?

dikembuan kitai diatu (baris 6:8); (3) Selalu berati (belajar anang kelalu amu) ka tiap pengawa ti deka dikereja kitai ti dikena ngulih ka mayuh duit (baris 6:9, 10); (4) nguji rindu ka orang bukai ari ti rindu ka duit (baris 6:11); (5) Rindu ka pengawa TUHAN ari duit (baris 6:18 & Jaku Dalam 30:7-9).

☞ Utai ti manah ianya, kitai patut nemu bida utai ti dikedeka enggau utai ti diguna. Nyangka amat kitai chukup utai ti diguna dikena idup, tang lak ka kitai bisi pengirau enggau enda puas ati ka utai ti amat dikedeka ka kitai (nangi ka TUHAN). Nya alai Rasul Paul madah, kitai tau milih ati ti puas baka nya pan kitai nadai pemisi dikena idup. Awak kitai enda nyadi ka ulun pangingin ati ti mai nuju pengerusak, ianya enda nangi ka Allah Taala.

b) Ngiga pengerindu, ngelantang ka ati.

Bisi sekeda madah, enti enda “enjoy” ati enda senang; bisi pengaga peneka ati, bebini/bepangan mayuh, bejudi (4D), niki kelab malam ngirup ai bisa, ngintu pengerami tekellu iga enggau mayuh ka bukai. Laban enti enda bakanya, udah mati nadai enjoy agi ko jaku. **Tang kati kitai puas? Jaku Tangkan**: Rajah Solomon ti kaya kalia bekunsi penemu enggau kitai, “*Aram diatu, aku deka nguji ngelantang ka diri, ngiga utai ti manah (ngasai ka penyamai). Tang nya pan nadai reti*” (Pengajar 2:1).

➤ Lebu Raja Solomon ngena penyamai ba dunya tu dikena iya ngelantang ka ati diri, ba pengujong pengidup iya semua utai nya nyadi nadai reti, (Pengajar 1:2-8).

c) Ngiga pemandai, belajar sampai pandai (bulih degree, master & PhD).

i. Mayuh kitai belajar bebendar, laban deka pandai ari orang bukai, ngulih ka pemandai ni naka ulih diri. Bakani pan kitai ngembuan pelajar ka chukup tinggi, utai nya enda enda kala ngemuas ka ati. Laban udah nya lebu kitai gawa, kitai deka belajar ka teknologi baru - tiap-tiap taun endang selalu bisi ubah pemansang. “<sup>9</sup>Utai ti deka nyadi deka nyadi baru. Semua utai ti udah dikereja deka dikereja baru. Nadai utai baru didalam dunya. <sup>10</sup>Bisi utai bukai ti deka dikejaku (ditusoi). Peda! Kati tu utai ti baru? Tang nya utai endang udah bisi ari dulu, endang udah nyadi sebedau kitai ada.” (Pengajar 1:9-10).

➤ Semua utai ti dipelajar ka kitai ba dini-dini endur, baik ka ba sekula enggau ba tempat kereja endang ukai utai ti baru. Nya endang udah bisi apin kitai nemu iya. Laban TUHAN endang udah nyendia nya ka kitai, lalu kitai enda tau enda meransang diri ngiga iya.

ii. Pasal sekeda orang ka tinggi pelajar ulih ngaga komputer, macham kereta perang, kapal perang, bilun enggau senjata perang, bom nuklear, senapang. Semua utai nya tadi tau ngasuh belaya tauka tau ngasuh berperang laban sama deka meda penguat senjata ka digaga diri empu. Sekeda belajar ka penemu dikena ngereja pengawa dagang, tang enti salah dikena, sekeda sida ti pandai suah deka nipu orang ti enda nemu. **Tang kati kitai puas?**

## Nama Reti Pengidup?

- iii. Bisi sekeda endang amat belajar dikena mansik penyakit enggau enggau ngaga ubat, sida mega nengkebang ngaga bilun, kereta, komputer, talipaun enggau semua utai ti guna tiap hari. Sida mega belajar ka jalai dagang awak ka tau dikena ngemansang ka ekonomi semua orang. Laban semua utai nya enti dikena enggau manah tau pulai ka pemanah pengidup mensia mayuh. **Tang kati kitai puas?** Laban mayuh utai ti udah digaga manah, tang kitai agi deka ngaga lebih agi manah ari ti ka udah.
- iv. Belajar sampai pandai, enda salah, enti tuju iya dikena enggau betul. *“<sup>11</sup>Penemu dalam nya endang manah, tau nyadi ka pesaka lalu nya tau meri penguntong ngagai orang ti meda matapanas. <sup>12</sup>Laban penemu dalam nya tau ngibun kitai, ulih ngidup baka duit.”* (**Pengajar 7:11,12**). Laban kitai amat beguna ka orang tinggi pelajar enggau pintar ngereja pengawa dikena ngemansang ka diri, ka menua enggau bansa kitai empu. Kitai empu pan beguna ka pemandai dikena ngidup ka diri, awak ka enda merinsa.
- v. Mayuh orang makin pandai, ngembuan penemu ti dalam, nambah agi pengirau sida, lalu balat agi utai nya tau ngemedis ka sida, (**Pengajar 1:18**). Laban enti kitai makin pandai, kitai nemu mayuh agi utai ti enda kala ditemu sekeda orang bukai, ti ngujung ka pengirau ati makin nambah. Pemandai mai kitai ngelala mayuh macham utai ti enda kala di adang ka kitai tau nyadi, ti ngasuh kitai tau pedis lalu bisi pengirau.

## **Bah! Nama reti kitai idup deh? Tu salah, nya salah, nadai betul! Nadai aku nemu!**

Lebuh kitai macha jerita Rajah Solomon tu ba Sempekata Lama. Iya tu rajah ti pemadu kaya sereta bpenemu. Diatu iya ngajar kitai nama reti pengidup ba dunya tu. Laban semua utai nya udah di asai ka iya magang. Iya bekungsi enggau kitai, awak ka kitai tau mereti ka nama reti pengidup tu ti bendar.

### ***B. Dalam Bup Kudus bisi ngajar kitai tuju idup ti bendar***

- i. Rajah Solomon udah ngasai ka penyamai idup dalam dunya tu; pengelantang, pengeraja enggau ngembuan penemu ti dalam lebih agi ari orang ka udah dulu idup enggau ti dudi ari iya. Bisi nya ngasuh ati iya puas? (**Pengajar 2:1-11**). Nama pengujung iya udah nya? Semua penyamai ti dikingin kitai idup dalam dunya tu semina pulai ka pengerusak ngasuh ati kitai tebunsa ngapa nadai tuju mimit, (**2:11**).
- ii. Bakanya meh batang pengidup Rajah Solomon lebu iya nyadi Rajah (**1 Rajah 3:4-14**). Iya semina minta penemu ti dalam (baris 3:9) ngagai TUHAN, tang TUHAN meri iya lebih ari nya; pengaya enggau umur panjai (baris 3:13). Maya tu kalia Rajah Solomon endang amat kaya (**2 Bansa Israel 1:15; 9:13-28**).
- iii. Terubah, iya endang amat nitih ka peneka TUHAN, tang betaun-taun udah nya iya ngereja pengawa ka enda dikerindu ka TUHAN, (**1 Rajah 11:1-11**). Nya ti ngujung ka iya nadai agi bekuasa.

## Nama Reti Pengidup?

- iv. Kitai manding ka pengidup Rajah Solomon ditu, enti sema ka kitai tu nyadi kaya raya, kitai nadai ingat ka Tuhan kitai agi, laban kitai majak ka penyamai idup. Semua utai di kedeka ka kitai ulih magang. Tang siti utai ka enda ulih di kengai ka kitai iya nya sakit enggau pemat.
- v. Nama tuju kitai idup? “Nangi ka TUHAN, ngasi ka pesan Iya, laban nya kebuah kitai mensia digaga.” (Pengajar 12:13). Laban semua utai ka digaga kitai ba dunya tu dipansik Iya magang, nadai kitai ulih belalai siti pan utainya ari IYA, (baris 12:14).

### C. Tuju kitai bisi ba dunya tu, lalu nama kebuah TUHAN ngaga kitai? Bakatu;

- i. Mensia digaga ulih Allah Taala, awak ka nyadi penyaga semua utai dalam dunya. “<sup>6</sup>Nuan (Allah Taala) udah ngasuh iya (mensia) merintah atas utai ti udah digaga ngena jari Nuan. Nuan udah ngengkah ka semua utai dibaruh kaki iya. <sup>7</sup>Semua bedus enggau jelu sapi, jelu babas (kampung). <sup>8</sup>Semua burung di atas angin enggau ikan di tasik, semua utai ti nyemerai (meraka) semua tasik.” (Masmor 8:6-8). Pedu mega (Pemungkal 1:26b, 28). TUHAN meri mensia kuasa ti pepadu besai awak ka nyaga semua utai di dalam dunya. Tang ulih kategal kuasa ti pepadu besai, tanggung pengawa pan amat berat ba kitai mensia. Bakani kitai tau nyaga semua utai ti udah digaga TUHAN? Nya meh siti ari kebuah tuju TUHAN ngaga kitai mensia.
- ii. Mensia mega digaga ngambi ka ulih meri basa enggau mulia ngagai TUHAN. “Sida endangi anemiak AKU [Semua ti dikangau enggau nama AKU (Allah Taala)], sida ti udah digaga Aku kategal mulia AKU, ti udah AKU kempuk enggau ti udah dipenyadi ka AKU.” (Isaiah 43:7). “Nemiak Nuan semua deka nyadi lurus; Sida deka bempu tanah (menua) tu belama iya; sida iya dan (paung) ti ditanam AKU; digaga ari jari AKU; Awak ka AKU tau dimulia ka (dikemesai ka / dipebasa ka).” (Isaiah 60:21).
- iii. Mensia digaga ngambi ka ulih muji Iya. “Sida nya orang (mensia) ti digaga ka AKU Empu; Sida deka belagu muji (ngemesai ka) AKU.” (Isaiah 43:21).
- iv. Kitai mensia digaga ketegal ulih peneka Iya lalu bisi pengidup. “TUHAN enggau Allah Taala kami, Nuan endang patut nerima mulia enggau basa enggau kuasa, laban Nuan ti pengaga semua utai, ulih peneka Nuan, sida (mensia) bisi, lalu bulih pengidup.” (Pemandang 4:11). Genteran tu madah ka kitai, semua bala (semua utai idup) serega enggau dunya muji sereta bebasa ka Allah Taala, laban IYA ti Pengaga lalu ka semua utai Bepun ari IYA. TUHAN enggai meda kitai mati ketegal dosa, laban nya ukai tuju peneka Iya. Iya chukop rindu enti kitai ngereja pemadas, lalu kitai ulih ngesal ka penyalah diri, (Esekiel 18:21-23).
- v. Kitai mensia endang digaga ulih pengelandik Allah Taala, digaga awak ka ngereja utai ti badas, ngambi ka ulih besaum enggau Yesus Kristus, (Epesus 2:10). Kitai mensia digaga dikena mandang ka kuasa IYA ti besai.

Nya alai batang pengidup enggau reti pengidup endang semina taluk ka Jaku enggau Pesan TUHAN, nyembah enggau muji IYA sereta ngereja pengawa nitih ka peneka IYA, ukai peneka kitai empu.

## **Nama Reti Pengidup?**

Ngembuan pengarap ba Allah Taala, lalu ngereja pengawa IYA enggau naka ulih, laban IYA aja ti ulih meri kitai pengidup. Kitai di ada ka telanjai nadai mai pesaka reta ka dalam dunya tu. Bakanya mega lebu kitai mati, nadai utai di bai. Pengaya enggau pengelantang ka diri empu semina nyadi ka panjuk penguji, enti enda ditagang ari pun, laban enti kitai majak deka ngiga pengaya ba dunya tu, nya tau ngujong ka kitai nadai bulih pengidup ti diberi Jesus, ti udah disemaya ka Iya. Laban pengeraja tu pun semua pengerusak, enti pengeraja nya salah dikena, **(1 Timoti 6:6-10)**.

**Udah abis tu peda BAGI KE EMPAT - Kini Ka Penunga Kitai Enti Uдах Mati?**